



Il chantun Grischun sa participescha sco chantun ospitant a la Fête des Vignerons en il Vad.

FOTO PH. PACHE, CONFRÉRIE DES VIGNERONS

Il Grischun sco chantun ospitant a la Fête des Vignerons

■ **(cc) Il chantun Grischun sa participescha sco chantun ospitant a la Fête des Vignerons. La festa da viticulturs cun sia lunga tradiziun ha lieu mo mintga 25 onns a Vevey e tutga dapi il december 2016 tar il patrimoni cultural immaterial da l'Unesco.** Gia l'onn 1792 èn sa radunads ils possessurs da vignas dal Vad per premiar publicamain lur megliers vins. Dapi il 19. tschientaner è la festa da viticulturs a Vevey ina

gronda festa populara. Sin ina tribuna al liber preschentan 5000 acturas ed acturs in toc da teater ch'è vegnì producì da poetessas e poets, da musicistas e musicists sco er da choreografas e choreografs.

Per las totalmain 20 representaziuns vegnan mintgamai spetgads 20 000 aspectaturas ed aspectaturs che pajan entrada. Parallelamain ha lieu ina festa da la citad libramain accessibla che

attira mintga di bundant 40 000 visitadras e visitaders. La proxima festa è dals 18 da fanadur fin ils 11 d'avust 2019. Il chantun Grischun profita da l'ocasiun da sa preschentar durant ils dis chantunals cun sia diversità culturala e linguistica sco er cun sias cuntradas multifaras.

**Ulteriuras infurmaziuns davart la Fête des Vignerons: www.fetedesvignerons.ch
www.lebendigetraditionen.ch**